

# LA LETRA CONFOLENTESA

Canton de Confolent-Nòrd

eleccions cantonalas - març 98


## JAN URRÒZ: “Una persona, un mandat”

Vos vatz chausir un conselhier generau per representar tot nòstre canton; per èsser lo defensor e lo pòrta-paraula de l'ensemble de las 8 comunas que fan Confolent-Nòrd. deu èsser un òme libre, au-dessus deus interès particuliers de tau o tau partit, de tau o tau comuna.

Deurá èsser au service de tots.

Per quò, es pas bon que cumule d'autres mandats.

Ni maira, ni adjunt, m'interesse totparier aus afars publiques e ai totjorn defendut una



vision globala deu Confolentés, qu'es pas quela de se visar l'embonilh.

Emb mai d'aquò, crese en nòstre avenir si sabem chausir lo chamin qu'es nòstre.

Qu'es per quò que me pòrte davant vos per las eleccions cantonalas de març 1998.

## Un vrai project per lo Confolentés

D'autres candidats vos prometen tot mai son contrari, que las promessas costen pas char 'na velha d'eleccions.

Per me vòle pas far de catalògue. E un Conselhier Generau deu pas se contentar de jugar au Pair Nadau emb las subvencions departamentalas. Quò-quí quò a pro servit de bilanç per d'ancians titularis d'aqueu pòste. Mas si volem 'nar de l'avant, nos fau prener las chausas d'un autre biais.

Lo Confolentés, sovent obludat per quilhs que deciden a Engolesme deu plantar de se plànher, deu s'unir e agir.

Es plan temps de prener nòstres afars en man.

Per quò, un plan de plusiors annadas deu se metre en plaça, per fin de menar de las realisations sur plusiors exercicis budgetaris e en establissent de las prioritats de desvelopament a mieg e a long terme.

Espansilhar las subvencions jorn après jorn en segre las mòdas de la region o deu departament es pus d'actualitat. **Dijam quaus son nòstras prioritats e engatjam-las.**

## Ensenhador

### Pagina

Una persona, un mandat.....	1
Un vrai project.....	1
Estre et aculir.....	2
Mas prioritats.....	2/3
Viure dins un canton equilibrat.....	3
Quau sei.....	4

## Estre e aculir

Lo Confolentés, terra aculhenta, a totjorn conegut l'arribada de poblacions vengudas d'autres regions o d'autres país.

Mas son identitat occitana s'es gardada a travers sa linga, l'occitan de Lemosin.

Quela linga a la color de la cultura originala deu Confolentés. Qu'es ela que n'es la melhor expression. **Qu'es nòstre patrimòni lo mai valeiros**, e si per cas desapareissia, auriam deu mau a lo far tornar viure.

Malurosament, quilhs que saben lo mielhs la linga occitana se fan vielhs.

Um iò sap ben que "un vielh que se'n vai, qu'es 'na biblioteca que crama".

Tots quilhs que parlen l'occitan (qu'avem tòrt de 'pelar "patois") an conegut la persecucion de la part de las institucions, en particulier de l'escòla.

Quò n'es pas 'na rason per aver vonta de parlar una altra linga que lo francés. A l'encontrari, qu'es nòstra fiertat.

Dins l'Euròpa deu segle XXI, d'aver gardat sa vrai cultura es **'na chança de prumiera importància**. La Catalonha, la Flandra, lo País de Galas bastissen lor reviscolada economica en se servir de lors culturas millenarias.

Perque deuriam-nos donc, nautres, nos privar de la nòstra? **L'occitan es lo ben de tots e per tots**. Eiretat dins la familha, aprenhugut coma los vesins, o dins los libres, tornat trobat apres de l'annadas d'oblidança, nòstra linga deu èsser per tots los Confolentés, vielhs o pas vielhs, l'ustilh de la reconquesta de nòstra fiertat d'èsser d'aquí, d'èsser occitan.

**Aime mon país,  
Aime queu país,  
lu vòte occitan.**

**JAN URRÒZ**

## MAS PRIORITATS

### Lo trabalh:

- Favorisar l'installacion de pitas empresas.
- Aidar l'artisanat e lo pitit comerci.
- Facilitar l'installacion de jòunes en agricultura.
- Desvelopar en Charanta Lemosina un torisme en rapòrt emb las richessas deu país: sa ruralitat, sos paisatges, los chamins de permenada, la cultura occitana, l'eibertura sur lo monde (Festivau de folclòre).

### La formacion deus jòunes:

- Un gimnasi per los collegians de Confolent.
- Lo Liceu deu propausar de las formacions que serven los mestiers e las activitats qu'existen dins los environs.

### Lo sociau:

- Aidar a mantener a la maison lo monde atjat.
- Amelhorar l'aida au monde qu'an pas de revenguts.

### La qualitat de la vita:

- Proteccion de l'environament: assanir, amelhorar la qualitat de l'aiga.
- Encoratjar la renovacion deus bastits vielhs.
- Informar lo monde sur l'utilitat deu boscatge, e 'restar de lo destruir.
- S'opausar au project de descharja radioactiva de La Chapelle-Bâton.
- S'informar clarament sur lo project autorotier Niort-Limòtges que deu passar per Ambernac e Manòc.

### Un bon imatge per lo Confolentés:

- Valorisar lo país auprès deus jòunes per lor balhar envia de damorar.
- Crear un Ecomuseu deu Confolentés que monstraria la vita tradicionala mas que egalament faria veire las produccions d'aura: la lana, los teules, lo materiau electric e

electronique, los textiles, la vianda bovina e ovina ... "Ier, Ainuech, Deman".

- Metre en plaça una senhalisacion bilinga, perque l'occitan deu tornar trobar sa dignitat e sa presència publica..

#### Los services:

- S'opausar a la centralisacion deus services sur Engolesme.
- Pas tot centralisar sur Confolent en laissant lo desert ocupar la plaça tot autorn.
- Defendre l'ospitau.
- Modernisar lo malhum rotier (D 951) e ferroviari sur Limòtges-Engolesme.

#### SMCL:

- Federar l'energias e las bonas volontats autor deu Sindicat Mixte de la Charanta Lemosina per ne'n far un ustilh vertadier de dinamisacion e de desvelopament.
- Lutar contra la dispersion de l'iniciativas e per un project de país.

#### Conselh generau:

- Mielhs repartir los credits sur l'ensemble deu departament per fin que lo Confolentés sia pas laissat de costat.
- Ne pas destinar la Charanta Lemosina au sole ròlle de reserva d'aiga.
- Far partida deus noveus projects industriais (Plan Imatge, ...).

De las orientacions d'avenir  
De l'eideias realament modernas  
Per surtir de l'immobilisme  
Per far deu nuòu

**VOTATZ**  
**Jan URRÒZ**

sega de la p.1

## Un vrai project per lo Confolentés

Un ustilh exista: lo Sindicat Mixte. devem nos ne'n servir a fons. Los conselhiers generaus deus cantons interessats deven traduir la volontat e far blòque per se far auvir au Conselh Generau.

**Aurem mai de pes si avem de las prepausicions e si sabem far causa comuna per la Charanta Lemosina.** Tròp de niveus administratius, ente chascun tira a gi a jà, nos afeblis.

Devem presentar **un vrai project de País** en l'i associar la populacion, los elegits e la fòrça viva d'aqueu país.

### Viure dins un canton equilibrat

Una inegalitat inquietanta s'installa dins queu canton. L'activitat a tendéncia a se desvelopar sur Confolent-Ansac, deu temps que la resta deu canton s'abasis. Avem mestier d'un desvelopament equilibrat. **N-anam pas tornar far au nivèu deu canton la centralisacion que nos entraupa** au nivèu deu departament o de l'Estat.

Una bona chausa, una escòla de musica s'es facha a lessa. Qu'es un començament. Sens degalhar los sòus, fau prener en compte queu problema de desertificacion dins çò que se fai: Lessac, Espeneda, Pleuvila deven pas èsser obludats.

Far venir una autorota, deu luòc de profiter a tots, pòt èsser 'na barriera per quauquas comunas (Manòc, Ambernac); e parlam pas deu problema de l'accès que se pausará per tot lo monde.

Devem pas chavar nòstra tomba en laissant lo desert ganhar tot autorn deu chap-luòc. Perque **la vila de Confolent viurà solament si es entorada d'una campanha prospera.**

L'i sem pas 'ribats engueras: mas quò deu èsser çò que volem.

# Jan URRÒZ

Nascut en 1947.

Maridat, 3 dròlles, 1 pitit-filh.

Confolentés dempuei 1974; domiciliat a Manòc.

Professor d'anglés a Chabanés.

Militant occitan dempuei 25 ans.

Membre deu bureu nacionau deu Partit Occitan.

Candidat a las cantonalas en 1985 e 1992; a las legislativas de 1997.

Mon engatjament dins un "pitit" partit vòu dire que vòle trobar **de las solucions nuvelas aus problemas d'aura**. Auria pogut chausir una formacion politica mai tradicionala. Mas ai pas l'intencion de ne'n far 'na carriera. Crese mai a las eideias que aus "plaçous". Las "combinas", las "magolhas son pas mon biais de veire la vita politica. La **sinceritat** deu èsser la prumiera motivacion. Crese maitot a la **fidelitat**. Qu'es per quò qu'ai chausit de me batre per salvar la cultura occitana que es quela de nòstres davanciers e que deu profiter a nòstres pitits. Devem **veire un pauc pus loenh** que la riba de nòstre nas, **refusar de destruir** en quauquas annadas un patrimòni qu'es estat queu de dietzenas de generacions avant nautres.

Ma candidatura es **una candidatura de Resistença**.

Una resistença que bastis l'avenir sur lo passat, pas contra lo passat.

Compte sur l'aida de **tots quilhs que se contenten pas deu monde tau coma es. Sur quilhs que volen far quauqua ren per l'amelhorar**. E sens se copar de lors originas.

## PUS DE CUMUL !

Cumular los mandats es 'na tara de la classa politica.

D'en-sus a la basa deus pòstes multiples son occupats per la mesma persona. Quò destorna la democracia. La politica sembla èsser la chausa de professionaus. Pertant 'la deu demorar entre las mans deus citoiens. Si la politica es en generau criticada, si las abstencions monten, si lo poder se fai autoritari, quò ven deu cumul deus mandats.

Lo Conselh Generau que mena lo departament deu pas èsser confiscat per deus representants venguts d'autres estructuras, en particulier de las comunas. Quò riscaria de faussar las decisions. Libre de tot mandat electiu e independent deus partits tradicionaus, ai decidat de me presentar dins lo canton de Confolent-Nòrd per balhar la paraula au citoièn de basa dins lo debat de las eleccions cantonalas.

A Manòc, lo 25 de genier de 1998,

Jan URRÒZ

Sus Internet: <http://perso.wanadoo.fr/ujan/>

concebut e imprimat per lo candidat